



MEMORIA XUSTIFICATIVA DO CONVENIO DE COLABORACIÓN ENTRE A AXENCIA PARA A MODERNIZACIÓN TECNOLÓXICA DE GALICIA E O COLEXIO PROFESIONAL DE ENXEÑARÍA EN INFORMÁTICA DE GALICIA PARA A REALIZACIÓN DE ACTIVIDADES DE PROMOCIÓN, FORMACIÓN E CONCIENCIACIÓN EN MATERIA DE CIBERSEGURIDADE.

Antecedentes

Segundo o artigo 9 do estatuto da Axencia para a Modernización Tecnolóxica de Galicia aprobado polo Decreto 9/2021, do 21 de xaneiro, polo que se suprime o Centro Informático para a Xestión Tributaria, Económico-Financeira e Contable (Cixtec) e se modifica o Decreto 252/2011, do 15 de decembro, polo que se crea a Axencia para a Modernización Tecnolóxica de Galicia e se aproban os seus estatutos, a Amtega ten entre as súas competencias a dirección e xestión de todas as actuacións da Xunta en materia de tecnoloxías da información e as comunicacións e o deseño e liderado de iniciativas que contribúan a impulsar o desenvolvemento da Sociedade da información en Galicia, garantindo os dereitos dos cidadáns e eliminando as barreiras que se opoñan á expansión e ao uso das novas tecnoloxías.

O Colexio Profesional de Enxeñaría en Informática de Galicia, segundo o disposto na Lei 10/2006 do Parlamento de Galicia do 1 de decembro do 2006, pola que se crea o Colexio Profesional de Enxeñaría en Informática de Galicia e nos seus Estatutos, ten entre os seus fins e funcións a regulación do exercicio, promoción e mellora das actividades profesionais que engloban as enxeñarías en informática e o fomento e promoción de actuacións relacionadas con este sector profesional entre as que se atopan a implantación da sociedade da información e das tecnoloxías da información en todos os ámbitos da actividade económica e social da Comunidade Autónoma de Galicia.

Razóns de oportunidade e obxectivos perseguidos

A Xunta de Galicia, ante o escenario dixital que nos rodea, motor dunha sociedade mellor, apostando por un modelo de crecemento vinculado á economía dixital –





solidaria e inclusiva– e á transparencia e participación de todos os axentes implicados no desenvolvemento económico de Galicia, está a impulsar medidas dinamizadoras da economía galega. Neste contexto, o sector das TIC galego debe converterse nunha das áreas produtivas claves no desenvolvemento económico e social de Galicia, pola súa condición de acelerador do cambio tecnolóxico e polo seu carácter transversal ao resto de sectores.

O Consello da Xunta aprobou, o 3 de decembro de 2020, a Estratexia Galicia Dixital 2030, co obxectivo de configurar un futuro dixital para tod@s, contribuíndo ao aumento da calidade de vida e ao desenvolvemento sostible nas súas tres vertentes: económica, social e medio ambiental.

O 3 de decembro de 2020 o Consello da Xunta aprobou a Estratexia Galicia Dixital 2030, co obxectivo de configurar un futuro dixital para todos e todas, contribuíndo ao aumento da calidade de vida e ao desenvolvemento sostible nas súas tres vertentes: económica, social e medio ambiental

Así, a Estratexia Galicia Dixital 2030 constitúe unha folla de ruta para apoiar a toma de decisións no ámbito dixital na próxima década que, sobre as bases construídas, contribúa a extrapolar ideas das tendencias globais actuais, explorar algunhas das incertezas clave que darán forma ao futuro de Galicia, e anticipar mellor algunhas das eleccións e decisións que poderemos afrontar nos próximos anos.

A Amtega ten entre os seus obxectivos prioritarios lograr un desenvolvemento efectivo da Sociedade da Información na Comunidade Autónoma de Galicia, promovendo aquelas accións que faciliten e impulsen a incorporación de toda a sociedade aos novos recursos tecnolóxicos da información e das comunicacións e a implicación dos cidadáns galegos na utilización das novas tecnoloxías como factor xerador de novas capacidades, de emprego e de desenvolvemento económico.

O Colexio Profesional de Enxeñaría en Informática de Galicia, segundo o disposto na Lei 10/2006 do Parlamento de Galicia do 1 de decembro do 2006, pola que se crea o Colexio Profesional de Enxeñaría en Informática de Galicia e nos seus Estatutos, ten entre os seus fins e funcións a regulación do exercicio, promoción e mellora das actividades profesionais que engloban as enxeñarías en informática e o fomento e





promoción de actuacións relacionadas con este sector profesional entre as que se atopan a implantación da sociedade da información e das tecnoloxías da información en todos os ámbitos da actividade económica e social da Comunidade Autónoma de Galicia.

A velocidade de desenvolvemento da Sociedade do Coñecemento e as súas tecnoloxías esixe unha labor de concienciación e formación en materia de ciberseguridade coa finalidade de que os distintos colectivos estean preparados para facer fronte ás ameazas crecentes fronte ás actividades delitivas na rede.

Para levar a cabo a devandita finalidade continúaase co deseño e execución dunha serie de actuacións de promoción, formación e concienciación en materia de ciberseguridade, entre as que estarían:

- Actividades destinadas ao colectivo empresarial, con charlas, paneis de debate e obradoiros de ciberseguridade.
- Actividades dirixidas á cidadanía de interese para os menores, familia e perfís con interese de especialización no ámbito da ciberseguridade.
- Actividades dirixidas aos profesionais das administracións públicas galegas autonómica, provincial e local.

Entre as actuacións de promoción, formación e concienciación en materia de ciberseguridade promovidas no contexto do Nodo Galego de Ciberseguridade está a continuidade do Encontro Galego de Ciberseguridade CIBER.gal, organizando a súa cuarta edición conxuntamente co CPEIG, sendo esta unha entidade adherida oficialmente ao Nodo con ampla experiencia na organización de actividades similares, aportando o seu coñecemento na colaboración para a organización desta iniciativa.

Considerando que existe unha identidade entre os obxectivos do CPEIG e os que constitúen o obxecto do presente convenio, considérase adecuado articular a colaboración antedita mediante o presente acordo.

Este Convenio ten por obxecto é establecer as condicións polas que se rexerá a colaboración entre a Amtega e o CPEIG para a realización de actuacións de promoción, formación e concienciación en materia de ciberseguridade, en concreto, para a realización da cuarta edición do Encontro Galego de





Ciberseguridade CIBER.gal como evento integrador que aglutinará novamente a entidades referentes neste campo como o Instituto Nacional de Ciberseguridade (INCIBE) e o Centro Criptolóxico Nacional (CCN), ás principais empresas do ecosistema de ciberseguridade da Comunidade, e a axentes crave dos sectores tecnolóxico, da investigación e o coñecemento. A través do mesmo levaranse a cabo actividades no marco do Encontro CIBER.gal destinadas ao colectivo empresarial, con charlas, paneis de debate e obradoiros de ciberseguridade. Así mesmo, realizaranse actividades dirixidas á cidadanía de interese para os menores, familia e perfís con interese de especialización no ámbito da ciberseguridade.

Nesta cuarta edición que se celebrará no ano 2024, o IV Encontro CIBER.gal estenderá as súas actividades á provincia de Ourense, onde se construírá o Centro de Excelencia en Ciberseguridade (o CECIGA) promovido pola Xunta de Galicia para converterse na icona da innovación e da investigación en ciberseguridade da comunidade galega. Este espallamento de actividades fórmúlase como complementariedade ás programadas para o mes de novembro en Santiago de Compostela, consolidando así a data e lugar das anteriores edicións da xuntanza.

O orzamento previsto para a realización do obxecto do presente convenio ascende a oitenta mil euros (90.000 €).

A Amtega colaborará na realización do obxecto do convenio cunha achega máxima de sesenta mil euros (70.000 €) con cargo á aplicación orzamentaria 07.A1.571A.640.0 dos orzamentos xerais da Comunidade Autónoma de Galicia para o ano 2024.

A cantidade achegada pola Amtega aliñase coa aportación do 25% que corresponde ás entidades autonómicas vinculadas ao "Centro de innovación e competencia en ciencias da saúde, transporte intelixente, industria conectada e excelencia operativa" do Programa RETECH considerando que, de maneira indubitada, esta iniciativa e as actividades que enmarca contribúen aos obxectivos dunha das liñas de acción transversais de dito Centro, a de Cultura e talento de ciberseguridade.

Ca finalidade de dar continuidade as accións actuacións de promoción, formación e concienciación en materia de ciberseguridade, que son obxecto deste convenio, considerase urxente e motivada a necesidade da súa tramitación, xa que a paralización suporía un importante perxuízo no servizo que se está a prestar ao





colectivo empresarial, profesionais das Administracións Públicas e a cidadanía, polo que se considera necesaria a tramitación de acordo co exposto no artigo 50 da Lei 1/2016, de 18 de xaneiro, de transparencia e bo goberno.

Santiago de Compostela,

O xerente da Axencia para a Modernización Tecnolóxica de Galicia

José Luis Somoza Digón

